

摘藻堂四庫全書薈要

史部

欽定四庫全書蒼要卷六千三百八十八史部

元史卷九

明翰林學士亞中大夫知制誥兼修國史宋濂等修

本紀第九

世祖六

十三年春正月丁卯朔克潭州宋安撫使李芾盡室自
焚死阿爾哈雅分遣官屬招徠未附者旬日間湖州南
郡相繼悉降得府一州六軍二縣四十戶五十六萬一

千一百一十二口百五十三萬七千七百四十巴延軍

次嘉興府安撫劉漢傑以城降董文炳軍次乍浦宋統

制官劉英以本軍降辛未董文炳軍至海鹽知縣事王

與賢及澉浦鎮統制胡全福建路馬步軍總管沈世隆

皆降壬申改都統領司為通政院命烏蘭哈達等領之

立回易庫于諸路凡十有一掌市易幣帛諸物敕大都

路總管府和顧和買權豪與民均輸癸酉宋相陳宜中

遣軍器監劉庭瑞賫宋主稱藩表章詣軍前稟議又致

宜中等書於巴延巴延以書答之乙亥詔諭四川制置使趙定應來朝徙大都等路獵戶戍大洪山之東符寶郎董文忠請貧病者勿徙從之宋復遣監察御史劉岳賈宋主稱藩表至軍前且致書巴延為宗社生靈請命丙子賞哈喇婁台所部將士征建都功銀鈔錦衣丁丑宋遣都統洪模賈陳宜中吳監等書請俟宗長福王至同詣軍前戊寅巴延以軍出嘉興府留萬戶呼圖克千戶王圖烈齊戍之劉漢傑仍為其府安撫使辛巳命雲

南行省給建都屯軍弓矢軍次崇德縣宋遣侍郎劉庭瑞都統洪模來迓行都元帥府宋都木達言江西隆興建昌撫州等郡雖附而閩廣諸州尚阻兵乞增兵進討敕以襄漢軍四千益之壬午軍次長安鎮董文炳以兵來會宋陳冝中吳堅等違約不至癸未軍次臨平鎮甲申次臯亭山阿婁罕以兵來會宋主遣其保康軍承宣使尹甫和州防禦使吉甫等貴傳國玉璽及降表詣軍前其辭曰大宋國主焜謹百拜奉表於大元仁明神武

皇帝陛下臣昨嘗遣侍郎柳岳正言洪雷震捧表馳詣
闕庭敬伸卑悃伏計已徹聖聽臣眇焉幼沖遭家多難
權奸似道背盟誤國臣不及知至於興師問罪宗社阽
危生靈可念臣與太后日夕憂懼非不欲遷辟以求兩
全實以百萬生民之命寄臣之身今天命有歸臣將焉
往惟是世傳之鎮寶不敢愛惜謹奉太皇命戒痛自貶
損削帝號以兩浙福建江東西湖南北二廣四川見在
州郡謹悉奉上聖朝為宗社生靈祈哀請命欲望聖慈

垂哀祖母太后耄及卧病數載臣莞焚在疚情有足矜

不忍臣祖宗三百年宗社遽至殞絕曲賜裁處特與存

全大元皇帝再生之德則趙氏子孫世世有賴不敢弭

忘臣無任感天望聖激切屏營之至已延既受降表玉

璽復遣囊嘉特以趙尹甫賈餘慶等還臨安召宰相出

議降事乙酉師次臨安北十五里囊嘉特洪模以總管

殷俊來報宋陳宜中張世傑蘇劉義劉師勇等挾益廣

二王出嘉會門渡浙江遁去惟太皇太后嗣君在宮已

延亟使諭阿嘍罕董文炳范文虎率諸軍先據守錢塘
口以勁兵五千人追陳宜中等過浙江不及而還丙戌
已延下命禁軍士入城違者以軍法從事遣呂文煥齎
黃榜安諭臨安中外軍民俾安堵如故時宋三司衛兵
白晝殺人張世傑部曲尤橫閭里小民乘時剽殺令下
民大悅已延又遣宣撫程鵬飛計議孫鼎亨囊嘉特洪
君祥入宮安諭太皇謝氏丁亥雲南行省賽音諤德齊
以改定雲南諸路名號來上又言雲南貿易與中州不

同鈔法實所未諳莫若以交會貶子公私通行為便並

從之戊子中書省臣言王孝忠等以罪命往巴達山採

寶玉自劾道經沙州值和和叛孝忠等自拔來歸令於

瓜沙等處屯田從之大名路達嚕噶齊舒沁布坐姦賊

伏誅沒其家宋主祖母謝氏遣其丞相吳堅文天祥樞

密謝堂安撫賈餘慶中貴鄧惟善來見巴延於明因寺

巴延顧文天祥舉動不常疑有異志遂令萬戶益古岱

宣撫索多羈留軍中且以其降表不稱臣仍書宋號遣

程鵬飛洪君祥偕來使賈餘慶復往易之己丑軍次湖
州市遣千戶囊嘉特省掾王祐齋傳國王璽赴闕敕高
麗國以有官子弟為質中書省臣言賦民舊籍已有定
額至元七年新括協濟合併戶為數凡二十萬五千一
百八十敕減今歲絲賦之半庚寅巴延建大將旗鼓率
左右翼萬戶巡臨安城觀潮浙江於是宋宗室大臣以
次來見暮還湖州市辛卯張弘範孟祺程鵬飛齋所易
宋主稱臣降表至軍前甲午復薊州平谷縣立隨路都

轉運司仍詔諭諸處管民官以昂吉爾岱綽哈所部軍
五百戍哈達城伯奇台所部軍六百移戍建都其烏爾
圖托輝軍前在建都者並遣還翼穿濟州漕渠以真定
總管實保為中書右丞二月丁酉詔劉頡程德輝招淮
西制置使夏貴已亥克臨江軍庚子宋主焘率文武百
僚詣祥曦殿望闕上表乞為藩輔遣右丞相兼樞密使
賈餘慶樞密使謝堂端明殿學士簽樞密院事家鉉翁
端明殿學士同簽樞密院事劉卬奉表以聞宋主祖母

太皇太后亦奉表及牋是日宋文武百司出臨安府詣
行中書省各以其職來見行省承制以臨安為兩浙大
都督府都督孟古岱范文虎入城視事辛丑巳延令張
惠阿嘍罕董文炳左右司官石天麟楊晦等入城取軍
民錢穀之數閱實倉庫收百官誥命符印悉罷宋官府
散免侍衛禁軍宋主焘遣其右丞相賈餘慶等充祈請
使詣闕請命右丞相命吳堅文天祥同行行中書省右
丞相巴延等以宋主焘舉國內附具表稱賀兩浙路得

府八州六軍一縣八十一戶二百九十八萬三千六百七十二口五百六十九萬二千六百五十丁未詔諭臨安新附府州司縣官吏士民軍卒人等曰間者行中書省右丞相已延遣使來奏宋母后幼主暨諸大臣百官已於正月十八日齋醴綬奉表降附朕惟自古降王必有朝覲之禮已遣使特往迎致爾等各守職業其勿妄生疑畏凡歸附前犯罪悉從原免公私逋欠不得徵理應抗拒王師及逃亡嘯聚者並赦其罪百官有司諸王

邸第三學寺監祕省史館及禁衛諸司各宜安居所在
山林河泊除巨木花果外餘物權免徵稅祕書省圖書
太常寺祭器樂器法服樂工鹵簿儀衛宗正譜牒天文
地理圖冊凡典故文字并戶口版籍畫仰收拾前代聖
賢之後高尚儒醫僧道卜筮通曉天文歷數并山林隱
逸名士仰所在官司具以名聞名山大川寺觀廟宇并
前代名人遺跡不許拆毀鰥寡孤獨不能自存之人量
加贍給已延就遣宋內侍王埜入宮收宋國袞冕圭璧

符璽及宮中圖籍寶玩車輅輦乘鹵簿麾仗等物戊申
立浙東西宣慰司於臨安以戶部尚書麥歸祕書監焦
友直為宣慰使吏部侍郎楊居寬同知宣慰司事並兼
知臨安府事乙卯詔諭淮東制置使李庭芝淮西制置
使夏貴及所轄州軍縣鎮官吏軍民丁巳命焦友直括
宋祕書省禁書圖籍戊午祀先農東郊淮西制置夏貴
以淮西諸郡來降唯鎮巢軍復叛貴遣使招之守將洪
福殺其使貴親至城下福始降阿珠斬之軍中淮西路

得府二州六軍四縣三十四戶五十一萬三千八百二十七口一百二萬一千三百四十九庚申召巴延偕宋君臣入朝辛酉車駕幸上都設資戒大會於順德府開元寺巴延遣本布周青招泉州蒲壽庚壽晟兄弟甲子董文炳索多發宋隨朝文士劉裒然及三學諸生赴京師太學生徐應鑣父子四人同赴井死帝既平宋召宋諸將問曰爾等何降之易耶對曰宋有強臣賈似道擅國柄每優禮文士而獨輕武官臣等久積不平心離體

解所以望風而送款也帝命董文忠答之曰借使似道實輕汝曹特似道一人之過耳且汝主何負焉正如所言則似道之輕汝也固宜三月丁卯命樞密副使張易兼知祕書監事己延入臨安遣郎中孟祺籍宋太廟四祖殿景靈宮禮樂器冊寶暨郊天儀仗及祕書省國子監國史院學士院太常寺圖書祭器樂器等物戊辰括江南己附州郡軍器甲戌阿珠遣使報廬州夏貴己降文天祥自鎮江遁去追之弗獲荆湖南路行中書省言

潭州既定湖南州郡降者相繼即分命諸將鎮守其地
從之宋福王與芮自浙東至巴延軍中以獨松關守將
張濡嘗殺奉使廉希賢斬之籍其家乙亥巴延等發臨
安丁丑安塔哈阿嘍罕董文炳詣宋主宮趣宋主焜同
太后入覲郎中孟祺奉詔宣讀至免繫頸牽羊之語太
后全氏聞之泣謂宋主焜曰荷天子聖慈活汝當望闕
拜謝宋主焜拜畢子母皆肩輿出宮唯太皇太后謝氏
以疾留戊寅敕諸路儒戶通文學者三千八百九十並

免其徭役其富實以儒戶避役者為民貧乏者五百戶
隸太常寺敕淮西廬州置總管萬戶府以中書右丞河
南等路宣慰使哈喇哈斯襄陽管軍萬戶邱浹並行府
事庚辰囊嘉特以宋玉璽來上乙酉贛吉袁南安四郡
內附庚寅賜郡王卓多銀印敕上都和顧和買並依大
都例以中書右丞實保為戶部尚書閏月丙申置宣慰
司於濟寧路掌印造交鈔供給江南軍儲以前西夏中
興簽行中書省事溫都爾濟遜大都路總管張守智並

為宣慰使東川行樞密院總帥汪惟正略地涪州克山
寨谿洞二十有三所丁酉詔湖廣阿爾哈雅呼圖克特
穆爾赴闕令托博和囉哈圖崔斌並留後鄂州辛亥命
副樞張易遣宋降臣吳堅夏貴等赴上都戊午淮西萬
戶府招降方山等六寨甲子禁西番僧持軍器以中書
省左右司郎中郝禎參知政事夏四月乙丑朔阿珠以
宋高郵寶應嘗餽揚州遣蒙古軍將哲辰及史弼等
守之別遣都元帥博囉罕等攻泰州之新城丁卯賜諸

王圖贈金印戊辰以河南兵事未息開元路民饑並弛
正月五日屠殺之禁庚午敕南商貿易京師者毋禁辛
未行江西都元帥宋都木達以應詔儒生醫卜士鄭夢
得等六人進敕隸祕書監丙子省東川行樞密院及成
都經略司以其事入西川行院復石人山寨居民于信
陽軍免大都醫戶去歲絲銀已卯以侍衛親軍征戍歲
久放令還家期六月各歸其軍庚辰以碩達勒達分地
歲輸皮革自今並入上都壬午召嗣漢天師張宗演赴

闕乙酉召昭文館大學士姚樞翰林學士王磐翰林侍
講學士圖克坦公履赴上都庚寅修太廟以北京行中
書省廉希憲為中書右丞行中書省事於荆南府五月
乙未朔巴延以宋主焘至上都制授焘開府儀同三司
檢校大司徒封瀛國公以平宋遣官告天地祖宗於上
都之近郊遣使代祀嶽瀆己亥巴延請罷兩浙宣慰司
以孟古岱范文虎仍行兩浙大都督府事從之庚子定
度量壬寅宋三學生四十六人至京師癸卯復沂莒膠

密寧海五州所括民為防城軍者為民免其徭徭二年
乙巳賜巴延所部有功將校銀二萬四千六百兩阿珠
遣總管陳傑攻拔秦州之新城遣萬戶烏瑪喇守之以
備秦州丁未宋揚州都統姜才攻灣頭堡阿爾彬擊走
之殺其步騎四百人右衛親軍千戶董士元戰死戊申
宋馮都統等自真州率兵二千戰船百艘襲瓜洲阿珠
遣萬戶實喇罕阿都齊等出戰大敗之追至珠金沙得
船七十七艘馮都統等赴水死改博州為東昌路己酉

括獵戶鷹坊戶為兵乙卯靖州張州判及李信李發焚
其城退保飛山新城行中書省發兵攻殺之徙其黨及
家屬于大都宋江西制置黃萬石率其軍來附敕令入
覲辛酉安西王相府請頒詔招合州張珏不從癸亥陞
異樣局為總管府秩三品六月甲子朔敕新附三衛兵
之老弱者放還其家己巳以孔子五十三世孫曲阜縣
尹孔治兼權主祀事命東征元帥府選襄陽生券軍五
百充侍衛軍置行戶部于大名府掌印造交鈔通江南

貿易庚午敕西京僧道伊囉勒昆達實密等有室家者
與民一體輸賦辛未命阿爾哈雅出征廣西請益兵選
軍三萬俾將之壬申罷兩浙大都督府立行尚書省於
鄂州臨安設諸路宣慰使以行省官為之並帶相銜其
立行省者不立宣慰司甲戌以大明厯浸差命太子贊
善王恂與江南日官置局更造新厯以樞密副使張易
董其事易恂奏今之厯家徒知厯術罕明厯理宜得者
儒如許衡者商訂詔衡赴京師宋揚州姜才夜率步騎

數千趨丁村堡守將史弼哲辰出戰斬首百餘級獲馬四十匹詰旦阿里都督陳巖以灣頭堡兵邀其後巴延徹爾踵至所將皆阿珠麾下兵姜才軍遙望旗幟即走遂大破之獲米五千餘石阿珠又以宋高郵水路不通必由陸路餽運千戶額森呼圖克以千騎邀之數日米運果來殺負米卒數千獲米三千石戊寅詔作平金平宋錄及諸國臣服傳記仍命平章軍國重事耶律鑄監修國史戊子樞密院言陳宜中張世傑聚兵福建攻我

師江西都元帥宋都木達求援命以安慶蘄黃等郡兵
付宋都木達將之己丑宋都木達言福建魏天祐游義
榮棄家來附以天祐為管軍總管兼知邵武軍事義榮
遙授建寧路同知充管軍千户壬辰下詔招諭宋揚州
制置李庭芝以次軍官及通泰真滁高郵大小官員又
詔諭陳宜中張世傑蘇劉義劉師勇等使降李庭芝留
朱煥守揚州與姜才率步騎五千東走阿珠親率百餘
騎馳去督右丞阿里萬戶劉國傑分道追及泰州西殺

步卒千人庭芝等僅得入遂築長圍塹而守之阿珠獨當東南面斷其走路以戶部尚書張澍參知政事行中書省事于北京秋七月乙未行中書省左右司郎中孟祺以亡宋金玉寶及牌印來上命太府監收之丙申淮安寶應民流寓邳州者萬餘口聽還其家丁酉宋涪州觀察陽立子嗣榮請降詔招諭其父從之戊戌陞閬州為保寧府敕山丹城直隸省部以達魯噶齊希扎仍領之壬寅以李庭出征賞其部將李承慶等鈔馬衣服甲

仗有差乙巳朱煥以揚州降丁未詔諭廣西路靜江府
等大小州城官吏使降甲寅賜諸王博囉印以楊村至
灣雞泊漕渠洄遠改從孫家務乙卯宋泰州守將孫良
臣與李庭芝帳下卒劉發鄭俊開北門以降執李庭芝
姜才繫揚州獄丙辰阿珠以總管烏瑪喇等守泰州其
通滁高郵等處相繼來附淮東路得州十六縣三十三
戶五十四萬二千六百二十四口一百八萬三千二百
十七遣使持香幣祠獄瀆后土以中書右丞阿爾哈雅

為平章政事簽書樞密院事淮東行樞密院拜竒頁勒
密實為中書右丞參知政事董文炳為中書左丞淮東
左副都元帥達春兩浙大都督范文虎江東江西大都
督知江州呂師夔淮東淮西左副都元帥陳巖並參知
政事八月己巳穿武清蒙村漕渠敕漢軍都元帥庫庫
岱李庭將侍衛軍二千人西征陞鄆陰縣為鄆州乙亥
斬宋淮東制置使李庭芝都統姜才于揚州市庚辰罷
襄陽統軍司車駕至自上都遣太常卿托果斯以銅爵

一豆二獻于太廟以四萬戶總管鄂囉齊參知政事九月壬辰朔命國師琳沁作佛事于太廟己亥享於太廟常饌外益野豕鹿羊蒲萄酒庚子命姚樞王磐選宋三學生之有實學者留於京師餘聽還家辛丑遣瀘州七田軍四千轉漕重慶癸卯以平宋赦天下乙巳高麗國王王慎上參議中贊金方慶功授虎符丙午敕常德府歲貢包茅丁未諭西川行樞密院移檄重慶俾內附命有司隳沿淮城壘辛亥太白犯南斗甲寅太白入南斗

乙卯以吐番哈達城為寧遠府辛酉召宋宗臣鄂州教授趙與票赴闕設資戒會於京師阿珠入覲江淮及浙東西湖南北等路得府三十七州一百二十八關一監一縣七百三十三戶九百三十七萬四百七十二口千九百七十二萬一千一十五冬十月甲子以陳巖拔新城丁村功賜金五十兩部將劉忠等賜銀有差乙亥賜皇子北平王出征軍士貧乏者羊馬幣帛有差申明以良為娼之禁丁亥兩浙宣撫使焦友直以臨安經籍圖

畫陰陽祕書來上戊子淮西安撫使夏貴請入覲乞令其孫貽孫權領宣撫司事從之以淮東左副都元帥阿里為平章政事河南等路宣慰司哈喇哈斯為中書右丞兵部尚書王儀吏部尚書兼臨安府安撫使揚鎮河南河北道提刑按察使密里呼忻並參知政事參知政事陳巖行中書省事於淮東十一月癸巳安西王所部軍克萬州丙午賜阿珠所部有功將士二百三十九人各銀二百五十兩西川行院呼敦言所部軍士久圍重

慶逃亡者衆乞益軍一萬并降詔招誘逋民之在大良
平者並從之壬子賜婁達袞軍有功及死事者銀鈔有
差癸丑併省內外諸司乙卯太陰犯填星庚申敕管民
及理財之官由中書銓調軍官由樞密院定議隳襄漢
荆湖諸城南平招撫使兼知峽州事趙真請降詔招諭
夔州安撫張起巖從之高麗國王王愷遣其臣判祕書
寺朱悅來告更名疇十二月辛酉朔熒惑掩鈞鈴以十
四年厯賜高麗丁卯改雲南羅蔔甸為元江府路辛未

賜塔海所部戰士及死事者銀鈔有差賜呼巴哩等

戰功十九人銀千二百兩壬申李思敬告運使姜毅所

言悖妄指毅妻子為證帝曰妻子豈為證者耶詔勿問

乙亥定江南所設官府辛巳以軍士圍守崇慶勞苦賜

鈔六千錠庚寅詔諭浙東西江東西淮東西湖南北府

州軍縣官吏軍民昔以萬戶千戶漁奪其民致令逃散

今悉以人民歸之元籍州縣凡管軍將校及宋官吏有

以勢力奪民田廬產業者俾各歸其主無主則以給附

近人民之無生產者其田租商稅茶鹽酒醋金銀鐵冶
竹貨湖泊課程從實辦之凡故宋繁冗科差聖節上供
經總制錢等百有餘件悉除免之巴延言張惠守宋府
庫不俟命擅啟管鑰詔阿珠詰其事仍諭江之東西浙
之東西淮之東西官吏等檢覈新舊錢穀除浙西浙東
江西江東湖北五道宣慰使陞江陵為上路瑞安府仍
為温州隴州為散府薊州復置豐潤縣陞臨洮渭源堡
為縣賜諸王金銀幣帛如歲例賜諸王奈曼岱等羊馬

價賞阿珠等戰功及賜降臣吳堅夏貴等銀鈔幣帛各有差賜巴延阿珠等青鼠銀鼠黃狃濟遜衣餘功臣賜豹裘獐裘及皮衣帽各有差是歲東平濟南泰安德州連海清河平灤西京西三州以水旱缺食賑軍民站戶米二十二萬五千五百六十石粟四萬七千七百十二石鈔四千二百八十二錠有奇平陽路旱濟寧路及高麗潘州水並免今年田租斷死罪三十四人

十四年春正月癸巳行都元帥府軍次廣東知循州劉

興以城降丙申以江南平百姓疲於供軍免諸路令歲所納絲銀賜嗣漢天師張宗演演道靈應沖和真人領江南諸路道教戊戌高麗全方慶等為亂命高麗王治之仍命實都洪察球爾飭兵禦備癸卯復立諸道提刑按察司甲辰命阿珠選銳軍萬人赴闕丁未知梅州錢榮之以城降戊申賜三衛軍士負乏者八千三百五十二人各鈔二錠幣十匹己酉賜耶律鑄鈔千錠甲寅敕宋福王趙與芮家貲之在杭越者有司輦至京師付其

家丙辰立建都羅羅斯四路守戍鄂摩等處並置官屬
己未以白玉碧玉水晶爵六獻于太廟括上都隆興北
京西京四路獵戶二千為兵置江淮等路都轉運鹽使
司及江淮榷茶都轉運使司命嗣漢天師張宗演修周
天醮于長春宮宗演還江南以其弟子張留孫留京師
二月辛酉命征東都元帥洪察球爾將兵二千赴上都
壬戌瑞州安撫姚文龍率張文顯來降家屬為宋人所
害賜文龍文顯等鈔有差癸亥彗星出東北長四尺餘

甲子遣使代祀嶽瀆后土丙寅改安西王傳銅印為銀
印立永昌路山丹城等驛仍給鈔千錠為本俾取息以
給驛傳之須諸王哲伯特穆爾言永昌路驛百二十五
疲于供給質妻孥以應役詔賜鈔百八十錠贖還之丁
卯荆湖北道宣慰使塔海拔歸州山寨四十七戊辰祀
先農於東郊甲戌西川行院布哈率衆數萬至重慶營
浮屠闢造梯衝將攻之其夜都統趙安以城降張珏臧
船江中與其妻妾順流走涪州元帥張德潤以舟師邀

之珏遂降車駕幸上都辛巳命北京選福珠所統軍三百赴上都壬午隳吉撫二州城隆興濱西江姑存之仍選汀州軍馬守禦瑞金縣丙戌連州守過元龍已降復叛塔海將兵討之元龍遁丁亥知南恩州陳堯道僉判林叔虎以城降詔以僧康戩琳沁嘉噶爾幹並為江南總攝掌釋教除僧租賦禁擾寺宇者以大司農御史大夫宣慰使兼領侍儀司事博囉為樞密副使兼宣徽使領侍儀司事三月庚寅朔以冬無雨雪春澤未繼

遣使問便民之事於翰林國史院耶律鑄姚樞王磐竇
默等對曰足食之道唯節浮費靡穀之多無踰醪醴麩
蘖况自周漢以來嘗有明禁祈賽神社費亦不貲宜一
切禁止從之辛卯湖廣行中書省言廣西二十四郡並
內附議復行中書省于潭州置廣南西路宣撫司於靜
江詔鄭鼎所將侍衛軍萬人還京師崔斌阿爾哈雅同
駐靜江呼圖克特穆爾鄭鼎同駐鄂漢賈居貞托博和
囉哈圖同駐潭州癸巳以行都水監兼行漕運司事甲

午以鄭鼎所部軍士撫定靜江之勞命還家少休期六
月赴上都乙未福建漳泉二郡蒲壽庚印德傅李珣李
公度皆以城降丁酉括馬三萬二千二百六匹孕駒者
還其主壬寅廣東肇慶府新封等州皆來降癸卯壽昌
府張之綱以從叛棄市乙巳命中外軍民官所佩金銀
符以色組繫於肩腋庶無褻瀆具為令庚戌建寧府通
判郭纘以城降黃州歸附官吏勝入覲以所部將校于
躍等三十一人戰功聞命官之簽書東西川行樞密院

事咎順言比遣同知隆州事趙孟焜齎詔招諭南平軍都掌蠻羅計蠻及鳳凰中壠羅韋高崖等四岩皆降田楊二家豕鸞夷民亦各遣使納款壬子寶應軍人施福殺其守將降于淮東都元帥府詔以福為千戶佩金符癸丑命汪惟正自東川移鎮鞏昌行中書省承制以閩浙溫處台福泉汀漳劍建寧邵武興化等郡降官各治其郡潭州行省遣使上言廣南西路慶遠鬱林昭賀藤梧融賓柳象邕廉容貴潯皆降得府一州十四復立襄

陽府襄陽縣平章政事浙西道宣慰使安塔哈為平章
政事行中書省事於江淮郡王哈達為平章政事行中
書省事於北京夏四月甲子宋特磨道將軍農士貴知
安平州李惟屏知來安州岑從毅等以所屬州縣溪洞
百四十七戶二十五萬六千來附癸酉省各路轉運司
事入總管府設鹽轉運司四置榷場於碣門黎州與吐
蕃貿易丙子召安撫趙與可宣撫陳巖入覲丙戌禁江
南行用銅錢均州復立南漳縣五月癸巳申巖大都酒

禁犯者籍家貲散之貧民辛丑千戶哈喇哈斯死於琿塔噶之戰命其子呼圖克岱爾襲職癸卯改廣南西路宣撫司為宣慰司廣西欽橫二州改立安撫司各道提刑按察司兼勸農事敕江南歸附官三品以上者遣質子一人入侍西番長阿里鼎寧濟等三十一族來附得戶四萬七百丙子融州安撫使譚昌謀為不軌伏誅辛亥以河南山東水旱除河泊課聽民自漁乙卯選蒙古漢軍相參宿衛詔諭思州安撫使田景賢又詔諭瀘州

西南番蠻王阿永筠連騰串等處諸族蠻夷使其來附
命真人李德和代祀濟瀆六月丙寅涪州安撫陽立及
其子嗣榮相繼來附命立為夔路安撫使嗣榮為管軍
總管並佩虎符仍賜鈔百錠壬申賞征廣戰死之家銀
各五十兩丁丑置尚膳院秩三品以提點尚食尚藥局
呼嚕蘇為尚膳使其屬司有七庚辰賞陽立所部戰士
鈔千錠甲申荆湖北道宣慰使赫德得謀者言夔府將
出兵攻荆南諭陽立等與塔海會兵禦之丁亥陞宗明

沙為崇明州以行省參政行江東道宣慰使阿嚙罕為
中書左丞行江東道宣慰使湖北道宣慰使鄂囉齊參
知政事行湖北道宣慰使秋七月戊子朔罷大名濟寧
印鈔局壬辰敕犯盜者皆棄市符寶郎董文忠言盜有
強竊賊有多寡似難悉寘於法帝然其言遽命止之丁
酉敕自今非佩符使臣及軍情急速不聽乘傳戊戌申
禁羊馬羣之在北者八月內毋縱出北口諸隘踐食京
畿之禾犯者沒其畜癸卯諸王錫里濟剗北平王于阿

里瑪圖之地械繫右丞相安圖誘脅諸王以叛使通好于海都海都弗納東道諸王亦弗從遂率西道諸王至和林城北詔右丞相巴延帥軍士禦之諸王呼魯岱率其屬來歸與右丞相巴延等軍合丙午置行御史臺於揚州以都元帥姜衛為御史大夫置八道提刑按察司戊申東川都元帥張德潤等攻涪州大敗之擒安撫程聰程廣置行中書省於江西以參知政事行江西宣慰使達春為右丞參知政事行江西宣慰使敏珠爾丹為

左丞淮東宣慰使徹爾特穆爾江東宣慰使張榮實江
西宣慰使李恒招討使頁特密實萬戶實勒們荆湖路
宣撫使程鵬飛閩廣大都督兵馬招討使蒲壽庚並參
知政事行江西省事壬子權大都商稅丁巳湖北宣慰
司調兵攻司空山復壽昌黃州二郡賜平宋將帥軍士
及簡州軍士廣西死事者銀鈔各有差回水窩淵聖廣
源王加封善佑常山靈濟昭應王加封廣惠安丘電泉
靈霈侯追封靈霈公以參知政事行江東道宣慰使呂

文煥為中書左丞八月戊午朔詔布哈行院西川丁卯

成都路倉收羨餘五千石按察司已治其罪命以其米

就給西川兵辛未常德府總管魯希文與李三俊結構

為亂事覺命行省誅之車駕畋于上都之北九月壬申

製鑰鐵海青圓符丙申廣南東路廣連韶德慶惠潮南

雄英德等郡皆內附甲辰福建行省以宋二王在其疆

境調都督孟古岱招討高興領兵討之昂吉爾實都唐

古特等引兵攻司空山寨破之殺張德興執其三子以

歸壬子福建路宣慰使行征南都元帥索多遣招討使
伯嘉努丁廣取建寧之崇安等縣及南劍州冬十月丙
辰朔日有食之己未享于太廟庚申湖北宣慰使塔爾
海略地至夔府太原坪禽其將誅之辛酉弛蓋州獵禁
乙亥以宋張世傑文天祥猶未降命安塔哈選銳兵防
邊隆興諸城禁無籍軍隨大軍剽掠者勿過關渡己卯
降臣郭曉魏象祖入覲賜幣帛有差壬午置宣慰司于
黃州甲申播州安撫使楊邦憲言本族自唐至宋世守

此土將五百年昨奉旨許仍舊乞降璽書從之以行省
參政呼圖克特穆爾托博和囉哈圖崔斌並為中書左
丞鄂州總管府達嚕噶齊張鼎湖北道宣慰使賈居貞
並參知政事十一月戊子樞密院臣言宋文天祥與其
徒趙孟潛同起兵行中書發兵攻之殺孟潛天祥僅以
身免詔以其妻孥赴京師右副都元帥張德潤上涪州
功賜鈔千錠乙未凡偽造寶鈔同情者並處死分用者
減死杖之具為令庚子命中書省檄諭中外江南既平

宋宜曰亡宋行在宜曰杭州以吏部尚書巴圖爾丹參
知政事十二月丙辰置中灤唐村淇門驛丁卯以大都
物價翔踴發官廩萬石賑糶貧民庚午梁山軍袁世安
以其城及金石城軍民來降壬申潭州行省復祁陽縣
斬首賊羅飛餘黨悉平乙亥都元帥楊文安攻咸淳府
克之以十五年厯日賜高麗國以參議中書省事耿仁
參知政事冠州及永年縣水免今年田租導任河復民
田三千餘頃賜諸王金銀幣帛等如歲例賜諸王額布

根雅克特穆爾等五百二十九人羊馬價鈔八千四百
五十二錠賞拜達勒等千三百五十五人戰功金百兩
銀萬五千一百兩鈔百三十錠及納竒實金素幣帛貂
鼠豹裘衣帽有差是歲賑東平濟南等郡饑民米二萬
一千六百十七石粟二萬八千六百十三石鈔萬一百
十二錠斷死罪三十二人

元史卷九

元史本紀卷九考證

至元十三年二月庚子宋文武百司各以其職來見

案原本脫來見二字今據明南監本增

七月丁酉陽立子榮請招諭其父 案陽字原本訛揚

今據宋史改

九月辛酉遣瀘州屯田軍轉漕重慶 案瀘州刻本訛

廬今據地理志及明南監本改

十一月乙卯太陰犯填星 案乙卯原本訛丁卯今據

前後干支及天文志改

十二月辛酉朔 案辛酉原本訛辛卯考天文志及宋史益廣二王傳俱作辛酉與前後干支合今據改

十四年二月丁亥禁擾寺宇者 案原本禁訛禁今據明南監本改

六月壬申賞征廣戰死之家銀各五十兩 案原本作壬寅今據前後干支改

七月戊申東川都元帥張德潤攻涪州 案德潤原本

訛德澗今據前後卷及明南監本改

欽定四庫全書薈要卷六千三百八十九史部

元史卷十

明翰林學士亞中大夫知制誥魚修國史宋濂等修

本紀第十

世祖七

十五年春正月辛卯阿喇卜丹將兵戍鄂端給米三千石鈔三十錠以千戶鄭邴有戰功陞萬戶佩虎符癸巳西京饑發米萬石賑之仍諭阿哈瑪特廣貯積以備闕

乏順德府總管張文煥太原府達魯噶齊台哈布哈以

按察司發其姦贓遣人詣省自首反以罪誣按察司御

史臺奏按察司設果有罪不應因事而告宜待文煥等

事決方聽其訴從之己亥收括拉木伊克官額森庫庫

岱等坐易官馬拉木克人畜免其罪以管民官兼領其

事官吏隱匿及擅易馬匹私配婦人者沒其家禁官吏

軍民賣所娶江南良家子女及為娼者賣買者兩罪之

官沒其直人復為良賜湖州長興縣金沙泉名為瑞應

泉金沙泉不常出唐時用此水造紫筍茶進貢有司具
牲幣祭之始得水事訖輒涸宋末屢加浚治泉迄不出
至是中書省遣官致祭一夕水溢可溉田千畝安撫司
以聞故賜今名封磁州神崔府君為齊聖廣佑壬寅
弛女直碩達勒達酒禁丙午安西王相府言萬戶圖們
岱爾郝扎拉布哈等攻克瀘州斬其將王世昌李都統
戊申從阿哈瑪特請自今御史臺非白于省毋擅召倉
庫吏亦毋究錢穀數及集議中書不至者罪之授宋福

王趙與芮金紫光祿大夫檢校大司農平原郡公庚戌
東川副都元帥張德潤大敗涪州兵斬州將王明及其
子忠訓總轄韓文廣張遇春詔軍官不能撫治軍士及
後擾致逃亡者沒家貲之半以阿爾尼格為大司徒兼
領將作院二月戊午祀先農蒙古胄子代耕藉田癸亥
咸淳府等郡及良平民戶饑以鈔千錠賑之命平章政
事安塔哈阿里選擇江南庶能之官去其冗員與不勝
任者復立河中府萬泉縣辛未以川蜀地多嵐瘴弛酒

禁丁丑熒惑犯天街庚辰征巴實伯里軍士免其徭役
壬午參知政事福建路宣慰使索多率師攻潮州破之
置太史院命太子贊善王恂掌院事工部郎中郭守敬
副之集賢大學士兼國子祭酒許衡領馬改華亭縣為
松江府遣使代祀嶽瀆以參知政事夏貴范文虎陳巖
並為中書左丞黃州路宣慰使唐古特史弼並參知政
事三月乙酉詔孟古忒索多蒲壽庚行中書省事于
福州鎮撫瀕海諸郡以沿海經畧副使哈喇忒領舟師

南征陞經畧使兼左副都元帥佩虎符丁亥太陰犯太白戊子太陰犯熒惑己丑行中書省請考覈行御史臺文卷不從甲午西川行樞密院招降西蜀重慶等處得府三州六軍一監一縣二十柵四十蠻夷一乙未宋廣王昺遣倪堅以表來上令俟命大都命揚州行省選特穆爾布哈所部兵助隆興進討丁酉命塔海毀夔府城戊戌劉宗純據德慶府梧州萬戶朱國寶攻之焚其寨柵遂拔德慶詔中書左丞呂文煥遣官招宋生熟券

軍堪為軍者月給錢糧不堪者給牛屯田庚子漢軍都
元帥李庭自願將兵擊張世傑從之西川行樞密院招
宜勝土恢等城及石榴寨相繼來降壬寅以諸路歲比
不登免今年田租絲銀癸卯都元帥楊文安遣兵攻克
紹慶執其郡守解龍命斬之乙巳廣南西道宣慰司遣
管軍總管崔永千戶劉潭王德用招降雷化高三州即
以永等鎮守之宋張世傑孫劉義挾廣王昺奔硯洲參
知政事密里忻張守智並行大司農司事夏四月乙

卯命元帥劉國傑將萬人北征賜將士鈔二萬六百七十一錠修會川縣盤古王祠祀之丙辰詔以雲南境土曠遠未降者多簽軍萬人進討戊午以江南土寇竊發人心未安命中書省左丞夏貴等分道撫治軍民檢覈錢穀察郡縣被旱災甚者吏廉能者舉以聞其貪殘不勝任者劾罷之甲子命布哈留鎮西川汪惟正率獲功蒙古漢軍官及降臣入覲大都巡軍之戍西川者遣還立雲南湖南二轉運司以時雨霑足稍弛酒禁民之

衰疾飲藥者官為醞釀量給之辛未置光祿寺以同知
宣徽院事推勸特穆爾為光祿卿廣州張鎮孫叛犯廣
州守將張雄飛棄城走出兵臨之鎮孫乞降命遣鎮孫
及其妻赴京師丁丑雲南行省招降臨安白衣和泥分
地域寨一百九所威楚金齒落落分地域寨軍民三萬
二千二百禿老蠻高州等連州等城寨十九所庚辰以
許衡言遣使至杭州等處取在官書籍版刻至京師壬
午立行中書省于建康府中書左丞崔斌言比以江南

官冗委任非人命阿里等沙汰而阿哈瑪特溺於私愛一門子弟並為要官詔並黜之又言阿拉卜丹臺臣劾其侵欺官錢事猶未竟今復授江淮參政不可詔止其行敕自今罷免之官宰執為宣慰宣慰為路官路官為州官淮浙鹽課直隸行省宣慰司官勿預改北京行省為宣慰司追江南工匠官虎符五月癸未朔詔諭翰林學士和爾果斯今後進用宰執及主兵重臣其與儒臣老者同議乙酉行中書言近討邵武建昌吉撫等巖洞

山寨獲聶大老戴異子餘黨皆下獨張世傑據礪洲攻
傍郡未易平擬遣宣慰使史格進討詔以伊蘇哈雅總
制之敕主兵官若已擢授其舊職宜別授有功者勿復
以子孫承襲申嚴無籍軍虜掠及傭奴代軍之禁甲午
諸職官犯罪受宣者聞奏受敕者從行臺處之受省札
者按察司治之其宣慰司官吏姦邪非違及文移案牘
從本道提刑按察司磨刷應有死罪有司勘問明白提
刑按察司審覆無冤依例結案類奏待命自行中書以

下應行公務小事限七日中事十五日大事三十日選
江南銳軍為侍衛親軍乙未以烏蒙路隸雲南行省仍
詔諭烏蒙路總管阿穆立站驛修道路其一應事務並
聽行省平章賽音諤德齊節制立川蜀水驛自敘州達
荆南府己亥江東道按察使阿巴齊求江東宣慰使呂
文煥金銀器皿及宅舍子女不獲誣其私匿兵仗詔行
臺大夫姜衛詰之事白免阿巴齊官辛亥制授張留孫
江南諸路道教都提點賜拱衛司官及其所部四百五

十人鈔二千六十錠六月乙卯改西蕃李唐城為李唐州庚申敕博囉齊達喇齊及司糧司幣等官並勿授符已授者收之壬戌賜瀘州降臣薛旺等鈔有差丙寅以江南防拓闕隘一十三所設官太冗選軍民官廉能者各一人分領陞濟南府為濟南路降西涼府為西涼州丁卯置甘州和糴提舉司以備給軍餉賑貧民甲戌詔汰江南冗官江南元設淮東湖南隆興福建四省以隆興併入福建其宣慰司十一道除額設員數外餘並罷

去仍削去各官舊帶相銜罷茶運司及營田司以其事
隸本道宣慰司罷漕運司以其事隸行中書省各路總
管府依驗戶數多寡以上中下三等設官宋故官應入
仕者付吏部錄用以史塔爾琿唐古特驟陞執政孟古
岱任無為軍達嚕噶齊復遙領黃州宣慰使並罷之時
淮西宣慰使昂吉爾入覲言江南官吏太冗故有是命
帝諭昂吉爾曰宰相明天道察地理盡人事能兼此三
者乃為稱職爾縱有功宰相非可覲回回人中阿哈瑪

特才任宰相阿里年少亦精敏南人如呂文煥范文虎
率衆來歸或可以相位處之又顧謂左右曰汝可諭姚
樞等江南官吏太冗此卿輩所知而皆未嘗言昂吉爾
乃為朕言之近侍劉特穆爾因言阿爾哈雅屬吏張鼎
今亦參知政事詔即罷去遂命平章政事赫伯等諭中
書省樞密院御史臺翰林院及諸南儒今為宰相宣慰
及各路達嚕噶齊佩虎符者俱多謬濫其議所以減汰
之者凡小大政事順民之心所欲者行之所不欲者罷

之乙亥敕省院臺諸司應聞奏事必由起居注丁丑太廟殿柱朽腐命太常少卿拜穆蘇告于太室乃易之戊寅全川西延溪洞徭蠻二十所內附己卯發蒙古軍千人從江東宣慰司張弘範由海道討宋餘衆參知政事孟古岱請頒詔招宋廣王曷及張世傑等不從庚辰處州張三八章焱季文龍等為亂行省遣宣慰使伯奇哩率兵討之辛巳達實多收括中興等路拉木伊克安南國王陳光晒遣使來貢秋七月壬午朔湖南制置張烈

良提刑劉應龍與周隆賀十二起兵行省調兵往討獲
周隆賀十二斬之烈良等舉家及餘兵奔思州烏羅洞
為官軍所襲二人皆死甲申賜親王阿雅噶齊所部建
都戍軍貧乏者鈔千二百七十七錠行御史臺增設監
察御史四員江南湖北道嶺南廣西道福建廣東道並
增設提刑按察司乙酉改江南諸路總管府為散府者
七為州者一散府為州者二丙戌以江南事繁行省官
未有知書者恐於吏治非便分命崔斌至揚州行省張

守智至潭州行省丁亥詔虎符舊用輝和爾字今易以國字癸巳以塔海征夔軍旋之還戍者及揚州江西舟師悉付水軍萬戶張榮寶將之守江口丙申以右丞達春呂師夔叅知政事賈居貞行中書省事于贛州福建江西廣東皆隸焉丁酉賜江西軍與張世傑力戰者三十人各銀五十兩以江西叅知政事李恒為都元帥將蒙古漢軍征廣命揚州行中書省分軍三千付李恒復上都守城軍二千人為民壬寅改鑄高麗王王愷駙馬

印丙午改開元宣撫司為宣慰司太倉為御廩資成庫
為尚用監皮貨局入總管府定江南俸祿職田戊申濮
州蝗已酉禁使人經行納琳驛辛亥改京兆府為安西
府詔江南浙西等處毋非理征科擾民建漢祖天師正
一祠於京師以叅知政事李恒為蒙古漢軍都元帥孟
古岱為福建路宣慰使張榮實張鼎並為湖北道宣慰
使頁特密實為招討使八月壬子朔追毀宋故官所受
告身以嘉定重慶夔府既平還侍衛親軍歸本司遣禮

部尚書柴椿等使安南國詔切責之仍俾其來朝丁巳
沿海經畧司行左副都元帥劉深言福州安撫使王積
翁既已降附復通謀於張世傑積翁上言兵力單弱若
不暫從恐為闔郡生靈之患詔原其罪壬戌有首高興
匿宋金者詔置勿問兩淮運糧五萬石賑泉州軍民乙
丑濟南總管張宏以代輸民賦嘗貸阿里阿都齊等銀
五百五十錠不能償詔依例停徵辛未復給漳州安撫
使沈世隆家貲世隆前守建寧府有郭贊者受張世傑

檄誘世隆世隆執贊斬之孟古岱以世隆擅殺籍其家
帝曰世隆何罪其還之仍授本路管民總管中書省臣
言近有旨追諸路管民官所授金虎符其江南路臣宜
仍所授從之制封泉州神女號護國明著靈惠協正善
慶顯濟天妃甲戌安西王相府言川蜀悉平城邑山寨
洞穴凡八十三其渠州禮義城等處凡三十三所宜以
兵鎮守餘悉徹毀從之己卯初立提刑按察司于輝和
爾分地庚辰以四川平勞賞軍士鈔二萬一千三百三

十九欽辛巳陞沼磁為廣平府路監察御史韓曷劾同知大都路總管府事錫喇卜丹毆部民至死詔杖之免其官仍籍沒官貲十之二詔行中書省索多蒲壽庚等曰諸蕃國列居東南島若者皆有慕義之心可因蕃舶諸人宣布朕意誠能來朝朕將寵禮之其往來互市各從所欲詔諭軍前及行省以下官吏撫治百姓務農樂業軍民官毋得占據民產抑良為奴以中書左丞董文炳簽書樞密院事參知政事索多蒲壽庚並為中書左

丞九月壬午朔敕以總管張子良所簽軍二千二百人
為侍衛軍俾張亨陳瑾領之癸未省東西川行樞密院
其成都潼川重慶利州四處皆設宣慰司詔分揀諸路
所括軍驗事力乏絕者為民其恃權豪避役者復為兵
所遣分揀官及本府州縣官能核正無枉者陞爵一級
又減至元九年所括三萬軍半以為民其商戶餘丁軍
並除之戊子以征東元帥府治東京庚寅昭信達嚕噶
齊李海拉蘓言願同張弘畧取宋二王調漢軍水軍俾

將之以中書左丞行江東道宣慰呂文煥為中書右丞
冬十月己未享于太廟常設牢醴外益以羊鹿豕蒲萄
酒庚申車駕至自上都辛酉賑巴實伯里實勒和斯等
饑民鈔二千五百錠分夔府漢軍二千新軍一千付塔
海將之賜哈達奇爾台軍士馬價幣帛二千匹其力戰
者賞賚有差乙丑正一祠成詔張留孫居之丁卯弛山
場樵採之禁己巳趣行省造海船付烏瑪喇張弘範增
兵四千俾將之庚午敕御史臺凡軍官私役軍士者視

數多寡定其罪詔河西西京南京西川北京等處宣慰
司案牘宜依江南近例令按察司磨照移河南河北道
提刑按察司治南京御史臺臣言實里巴之弟阿拉與
王權府等俘掠良民實里巴縱弗問及遣御史掾詰問
不伏詔執而鞠之十一月庚辰朔棗陽萬戶府言李均
收撫大洪山寨為宋朱純制所害命賜銀千兩調其家
丁亥以辰沅靖鎮遠等郡地接蠻獠民不安業命塔海
程鵬飛並為荆湖北道宣慰使置司常德路餘官屬留

荆南府供給糧食軍需壬辰江東道宣慰司囊嘉特言
江南既平兵民宜各置官屬蒙古軍宜分屯大河南北
以餘丁編立部伍絕其虜掠之患分揀官僚本以革阿
哈瑪特濫設之弊其將校立功者例行沙汰何以勸後
新附軍士宜令行省賜其糧無使闕乏帝嘉納之徵宋
相馬廷鸞章鑑赴闕甲午開酒禁復阿哈瑪特子呼遜
阿縹繖等官始呼遜等以崔斌論列免至是以張惠請
復之惠又請復其子巴蘓呼及其姪巴圖爾丹沙木斯

鼎前職帝疑惠不從勅已除官僚不之任者除名為農
丁酉召陳巖入覲已亥貸侍衛軍屯田者鈔二千錠市
牛具辛丑建寧政和縣人黃華集鹽夫聯絡建寧括蒼
及畚民婦自稱許夫人為亂詔調兵討之丁未行中書
省自揚州移治杭州立淮東宣慰司于揚州以阿嚶罕
為宣慰使詔諭沿海官司通日本國人市舶以叅知政
事程鵬飛行荆湖北道宣慰使閏月庚戌朔羅氏鬼國
主阿榨西南蕃主常昌盛並內附詔阿榨韋昌盛各為

其地安撫使佩虎符辛亥太白熒惑填星聚于房甲寅
幸光祿寺丙辰詔圖嚙齋同潭州行省官一員察戍還
病軍所過州縣不加顧恤者按之甲子發蒙古漢軍都
元帥張弘範攻漳州得山寨百五十戶百萬一是日謀
報文天祥見屯潮陽港亟遣先鋒張弘正總管囊嘉特
率輕騎五百人追及于五坡嶺麓中大敗之斬首七十
餘執文天祥及將校四人赴都十二月己卯朔簽書西
川行樞密院咎順招誘都掌蠻夷及其屬百一十人內

附以其長阿永為西南番蠻安撫使得蘭紐為都掌蠻
安撫使賜虎符餘授宣敕金銀符有差庚辰思州安撫
使田景賢播州安撫使楊邦憲請歸宋舊借鎮遠黃平
二城仍撤戍卒不允景賢等請降詔禁戍卒毋擾思播
之民從之鳴池等處招討使竒徹所領南征新軍不能
自贍者千人命屯田于京兆乙酉巴延以渡江收撫沙
陽新城陽羅堡閩浙等郡獲功軍士及降臣姓名來上
詔授虎符者入覲千戶以下並從行省授官丙戌揚州

行省上將校軍功者凡百三十四人授官有差丙申從
播州安撫楊邦憲請以鼎山仍隸播州庚子敕長春宮
修金錄大醮七晝夜丙午禁玉泉山樵採漁弋戊申以
敘州等處禿老蠻殺使臣色埒默命發兵討之封伯夷
為昭義清惠公叔齊為崇讓仁惠公以十六年厯日賜
高麗海州贛榆縣電傷稼免今年田租南寧吉瑞萬安
三郡內附開成路置屯田總管府廣安州隸之臨淄臨
朐清河復為縣導肥河入于鄆淤陂盡為良田會諸王

于大都以平宋所俘寶玉器幣分賜之賜諸王等金銀
幣帛如歲例是歲西京奉聖州及彰德等處水旱民饑
賑米八萬八百九十石粟三萬六千四十石鈔二萬四
千八百八十錠有奇斷死罪五十二人

十六年春正月己酉朔高麗國王王愷遣其簽議中贊
金方慶來賀兼奉歲幣壬子罷五翼特默齊重役軍癸
丑汪良臣言西川軍官父死子繼勤勞四十年乞顯加
爵秩詔從其請詔以海南瓊崖儋萬諸郡俱平令阿爾

哈雅入覲瀘州降臣趙金吳大才袁禹繩等從征重慶
其家屬為叛者所殺詔賜鈔有差仍以叛者妻奴付金
等殺高麗國置大灰艾州東京柳石字落四驛甲寅無
籍軍侵掠平民而諸王哲伯特穆爾所部為暴尤甚命
捕為首者寘之法赦移贛州行省還隆興高麗國來獻
方物辛酉合州安撫使王立以城降先是立遣間使降
安西王相李德輝東川行院與德輝爭功德輝單舸至
城下呼立出降川蜀以平東川行院遂言立久抗王師

嘗指斥憲宗宜殺之樞密院以其事聞而降臣李諒亦
訟立前殺其妻子有其財物遂詔殺立籍其家賞償諒
既而安西王具立降附本未來上且言東川院臣憤李
德輝受降之故誣奏誅立樞密院臣亦以前奏為非帝
怒曰卿視人命若戲耶前遣使計殺立久矣今追悔何
及卿等妄殺人其歸待罪斥出之會安西王使再至言
未殺立即召立入覲命為潼川路安撫使知合州事壬
戌分川蜀為四道以成都等路為四川西道廣元等路

為四川北道重慶等路為四川南道順慶等路為四川東道並立宣慰司賞重慶等處從征蒙古漢軍鈔三萬九千九百五十一錠改播州鼎山縣為播川縣丁卯賜叅知政事魯順田民百八十戶於江津縣戊辰立河西屯田給畊具遣官領之甲戌張弘範將兵追宋二王至崖山寨張世傑來拒戰敗之世傑遁去廣王昺偕其官屬俱赴海死獲其金寶以獻丙子詔諭又巴散毛等四洞蠻酋長使降以中書左丞拜奇頁勒密實同知樞密

院事禁中書省文冊奏檢用輝和爾書賜異樣等局官
吏工匠銀二千兩賜皇子鄂囉齊諸王巴爾達噶下軍
士與思州田師賢所部軍衣服及鈔有差二月戊寅朔
祭先農于籍田壬午陞溧州為路遣使訪求通皇極數
番陽祝泌子孫其甥傅立持泌書來上撥民萬戶隸明
里淘金以江南漕運舊米賑軍民之饑者癸未增置五
衛指揮司詔遣托和木哈喇蕪爾托迪括中興戶太史
令王恂等言建司天臺于大都儀象圭表皆銅為之宜

增銅表高至四十尺則景長而真又請上都洛陽等五處分置儀表各選監侯官從之甲申平章阿里布乞行中書省檢覈行御史臺文案且請行臺呈行省此御史臺呈中書省例從之以征日本敕揚州湖南贛州泉州四省造戰船六百艘移紹興宣慰司于處州己丑調潭州行省軍五千戍沿海州郡庚寅張弘範以降臣陳懿兄弟破賊有功且出戰船百艘從征宋二王請授懿招討使兼潮州路軍民總管及其弟忠義勇三人為管軍

總管千夫長塔喇海獲文天祥有功請授管軍千戶佩
金符竝從之壬辰詔諭宗師張留孫悉主淮東淮西荆
襄等處道教乙未伊蘓特穆爾言行臺文卷令行省檢
覈於事不便詔改之其運司文卷聽御史臺檢覈饒州
路達嚕噶齊諤格類擅用羨餘糧四千四百石杖之仍
沒其家詔湖南行省於戍軍還塗每四五十里立安樂
堂疾者醫之饑者廩之死者藁葬之官給其需遣官覈
實益都淄萊濟南逃亡荒地之為行營牧地者禁諸鄂

囉及漢人持弓矢其出征之所持兵仗即輸之官庫壬寅賜太史院銀一千七十八兩癸卯發嘉定新附軍千人屯田托里貝之地甲辰陞大都兵馬都指揮使司秩四品詔大都河間山東管鹽運司並兼管酒醋商稅等課程中書省臣請以真定路達嚕噶齊孟古岱為保定路達嚕噶齊帝曰此正人也朕將別以大事付之賞汪良臣所部蒙古漢軍收附四川功鈔五萬錠命嘉定以西新附州郡及田楊二家諸貴官子俱充質子入侍車

駕幸上都乙巳命同知太史院事郭守敬訪求精天文
厯數者西蜀四川道立提刑按察司丙午遣使代祀嶽
瀆后土詔河南西京北京等路課程令各道宣慰司領
之賞西川新附軍鈔三千八百五十錠以鄂端境內蒙
古軍耗乏并漢軍新附軍等賜馬牛羊及馬驢價鈔衣
服弓矢鞍勒各有差三月戊申朔詔禁歸德亳壽臨淮
等處畋獵庚戌敕郭守敬繇上都大都厯河南府抵南
海測驗晷景壬子囊嘉特括兩淮造回回礮新附軍匠

六百及蒙古回回漢人新附人能造礮者俱至京師庚申給千戶瑪南部下巴圖軍及土渾川軍屯田牛具丙寅敕中書省凡掾史文移稽緩一日二日者杖三日者死甲戌潭州行省遣兩淮招討司經歷劉繼昌招下西南諸番以龍方零等為小龍蕃等處安撫使仍以兵三千戌之中書省下太常寺講究州郡社稷制度禮官折衷前代參酌儀禮定擬祭祀儀式及壇壝祭器制度圖寫成書名曰至元州縣社稷通禮上之以保定路旱減

是歲租三千一百二十石夏四月己卯立江西榷茶運
司及諸路轉運鹽使司宣課提舉司癸巳以給事中兼
起居注掌隨朝諸司奏聞事戊戌以池州路達嚕噶齊
阿都齊戰功陞招討使兼本軍萬戶癸卯填星犯鍵閉
乙巳汪良臣言昔咎順兵犯成都掠其民以歸今嘉定
既降宜還其民成都制曰可敕上都軍四千衛都城
凡他所來戍者皆遣歸從索多請令泉州僧依宋例輸
稅以給軍餉詔諭揚州行中書省選南軍精銳者二萬

人充待衛軍併發其家赴京師仍給行費鈔萬六千錠
大都等十六路蝗五月己酉中書省請復授宣慰司官
虎符不允又請各路設提舉同提舉副提舉各一員專
領課程從之辛亥蒲壽庚請下詔招海外諸番不允詔
諭漳泉汀邵武等處暨八十四畬官吏軍民若能舉衆
來降官吏例加遷賞軍民按堵如故以泉州經張世傑
兵減今年租賦之半丙辰以五臺僧多匿逃奴逋賦之
民敕西京宣慰司按察司搜索之命輝和爾界內計畝

輸稅以各道按察司地廣事繁併勸農官入按察司增副使僉事各一員兼職勸農水利事甲子御史臺臣言先是省臣阿里布言有罪者與臺臣姜衛同問有旨從之臣等謂行省斷罪以意出入行臺何由舉正宜從行省問訖然後體察為宜制曰可高興侵用宋二王金三萬一千一百兩有奇銀二十五萬六百兩詔遣使追理詔漣海等州募民屯田置總管府及提舉司領之乙丑敕江陵等路巴圖戶一萬凡千戶置達魯噶齊一員直

隸省部丙寅敕江南僧司文移毋輒入遞臨洮鞏昌通
安等十驛非有海青符不聽乘傳丁卯改雲南寶山良
渠二縣為州己巳詔沿路驛店民家凡往來使臣不當
乘傳者毋給人畜飲食芻料完都河南七驛民貧乏給
其馬牛羊價鈔千八百錠庚午賜奈曼岱戰功及攻圍
重慶將士及宣慰使劉繼昌等鈔衣服各有差壬申以
呂虎來歸授順慶府總管佩虎符仍賜鈔五十錠徙丁
子峪所駐侍衛軍萬人屯田昌平癸酉烏蘭哈達奏言

賦北京西京車牛俱可運軍糧帝曰民之艱苦汝等竟不問但知役民使今年盡取之來歲禾稼何由得種其止之甲戌給雅蘓克所領工匠牛二千就令運米二千石供軍詔諭托爾齊等管甘州路宣課諸人毋或沮擾潭州行省上言瓊州宣慰馬旺已招降海外四州尋有土寇黃威遠等四人為亂今已擒獲詔置之極刑丙子進封柔乾河洪濟公為顯應洪濟公命宗師張留孫即行宮作醮事奏赤章于天凡五晝夜賜皇子鄂囉齊巴

勒丹等及千戶巴延岱等所部軍及和州站戶羊馬鈔
有差六月丁丑朔阿哈瑪特言常州路達魯噶齊馬怒
告發浙西按察司事高原不法四十事源亦劾恕事聞
詔令廷辯詔發新附軍五百人蒙古軍百人漢軍四百
人戍碭門魚通黎雅詔諭王相府及四川行中書省四
道宣慰司撫治播川務川西南諸蠻夷官吏軍民各從
其俗無失常業壬午以浙東宣慰使陳祐沒王事命其
子夔為管軍總管佩虎符甲申宋張世傑所部將校百

五十八人詣瓊雷等州來降敕造戰船征日本以高麗材用所出即其地製之令高麗王議其便以聞乙酉榆林洪贊刁窩每驛益馬百五十車二百牛如車數給之丙戌左右衛屯田蝗蝻生庚寅陞濟南府為路壬辰以叅知政事行河南等路宣慰使呼遜為中書左丞行中書省事癸巳以新附軍二萬分隸六衛屯田徹爾特穆爾言其部軍多為盜劫貲財有司不即理斷乞遣官詰治詔烏嚕克台往治之以布哈行西川樞密院事總兵

入川平宋諸城未下者仍令東川行樞密院調兵守釣魚山寨西川既平復立屯田軍官第功陞擢授宣敕金銀符者百六十一人詔以高州筠連州騰川縣新附戶於敘州等處治道立驛雲南都元帥愛魯克尼雅斯拉鼎招降西南諸國愛魯克將兵定亦乞不薛尼雅斯拉鼎將大理軍抵金齒蒲驃由蠟緬國界內招忙木巨木禿等寨三百籍戶十一萬二百詔定賦租立站遞設衛送軍軍還獻馴象十二戍戍改宣德府龍門鎮復為縣

庚子拘括河西西番拉木伊克戶辛丑以通州水路淺舟運甚難命樞密院發軍五千仍令食祿諸官在役千人開浚以五十日訖工癸卯以臨洮鞏昌通安等十驛歲饑供役繁重有質賣子女以供役者命選官撫治之甲辰以襄陽屯田戶四百代軍當驛役賜征北諸郡蒙古軍庫庫巴圖等力戰有功者銀五十兩戰歿者家給銀百兩從行伍者鈔一錠其餘衣物有差禁巴延徹爾諸峪寨捕獵免四川差稅以叅知政事行省中書事巴

圖爾丹為河南等路宣慰使以阿哈瑪特子呼遜為潭州行省左丞哈斯哈雅等並復舊職占城馬八兒諸國遣使以珍物及象犀各一來獻賜諸王所部銀鈔衣服幣帛鞍勒弓矢及羊馬價鈔等各有差五臺山作佛事秋七月戊申寧國路新附軍百戶詹福謀叛福論死授告者何士青總把銀符賜鈔十錠罷西川行省庚戌禁托克托和斯搜取乘傳者私物己卯應昌府依例設官置東宮侍衛軍定江南上中路置達魯噶齊二員下路

一員敕發西川蒙古軍七千新附軍三千付皇子安西
王丁巳交趾國遣使來貢馴象已未以德古爾穆蘓之
蘓默忒城為鎮西府敕以蒙古軍三千益都軍二千諸
路軍一千新附軍五千合萬人令李庭將之壬戌賞昂
吉爾所部力戰軍人銀五十兩死事者人百兩給其家
阿爾哈雅入覲獻金三千五百八十兩銀五萬三千一
百兩罷潭州行省造征日本及交趾戰船丙寅填星犯
鍵閉癸酉西南八番羅氏等國來附洞寨凡千六百二

十有六戶凡十萬一千一百六十有八詔遣伊聶濟崔
或至江南訪求藝術之人以中書左丞行四川行中書
省事汪良臣為安西王相賜諸王納爾琿所部有功將
校銀鈔衣裝幣帛羊馬有差以趙州等處水旱減今年
租三千一百八十一石命薩都修佛事十有五日八月
丁丑車駕至自上都庚辰太陰犯房距星戊子范文虎
言臣奉詔征討日本比遣周福藥忠與日本僧齋詔往
諭其國期以來年四月還報待其從否始宜進兵又請

簡閱舊戰船以充用皆從之海賊賀文達率衆來歸文
虎文虎以所得銀三千兩來獻有旨釋其前罪官其徒
四十八人就以銀賜文虎己丑宋降臣王虎臣陳便宜
十七事令張易等議可者行之庚寅敕沅州路蒙古軍
總管沁達罕征取桐木籠狔狔伯洞諸蠻未附者調江
南新附軍五千駐太原五千駐大名五千駐衛州以每
歲聖誕節及元辰日禮儀費用皆斂之民詔天下罷之
丁酉以江南所獲玉爵及站凡四十九事納于太廟己

亥海賊金通精死獲其從子溫有司欲論如法帝曰通
精已死溫何預焉特赦其罪庚子歲星犯軒轅大星甲
辰詔漢軍出征逃者罪死且沒其家置大護國仁王寺
總管府以賽音扎拉為達嚕噶齊李先祖為總管賜范
文虎僚屬二十一人金紋綾西錦衣賞征重慶將枝幣
帛有差賜諸王阿濟格糧五千石馬六百匹羊萬口九
月乙巳朔范文虎薦可為守令者三十人詔今後所薦
朕自擇之凡官守不勤於職者勿問漢人回回皆論誅

之且沒其家女直碩達勒達軍不出征者令隸民籍輸賦已酉罷金州守船軍千人量留監守餘皆遣還庚戌詔行中書省左丞呼遜兼領杭州等路諸色人匠以杭州稅課所入歲造繒段十萬以進杭蕪嘉興三路辦課官吏額外多取分例今後月給食錢或數外多取者罪之阿哈瑪特言王相府官趙炳云陝西課程歲辦萬九千錠所司果盡心措辦可得四萬錠即命炳總之同知揚州總管府事董仲威坐贓罪行臺方按其事仲威反

誣行臺官以他事詔免仲威官仍沒其產十之二戊午
王相府言四川宣慰司有籍無軍虛受賞者一萬七千
三百八人命詰治之議罷漢人之為達嚕噶齊者御史
臺臣言江南三路管課官於分例外支用鈔一千九百
錠命盡徵之詔遣使招諭西南諸蠻部首長能率所部
歸附者官不失職民不失業乙丑以呼巴哩巴爾斯台
為都元師將蒙古軍二千人河西軍一千人戍鄂端城
己巳樞密院臣言有唐古特者冒禁引軍千餘人於辰

溪沅州等處劫掠新附人千餘口及牛馬金銀幣帛等
而麻陽縣達魯噶齊鄂博布哈為之鄉導敕斬唐古特
鄂博布哈餘減死論以所掠者還其民給河西行省鈔
萬錠以備支用冬十月己卯享于太廟辛巳敘州夔府至
江陵界立水驛乙酉帝御香閣命大樂署令完顏椿等
肄文武樂戊子張融訴西京軍戶和買和雇有司匿所
給價鈔計萬八千餘錠官吏坐罪以融為侍衛軍總把
千戶托里總把呼達擅引軍入婺州永康縣界殺掠吏

民事覺自陳扈從先帝出征有功乞貸死敕没入其家
貲之半杖遣之辛卯賑和州貧民鈔乙未納碧玉爵于
太廟丙申太陰犯太微西垣上將辛丑以月直元辰命
五祖真人李居壽作醮事奏赤章凡五晝夜畢事居壽
請間言皇太子春秋鼎盛宜預國政帝喜曰尋將及之
明日下詔皇太子燕王叅決朝政凡中書省樞密院御
史臺及百司之事皆先啓後聞甲辰賜高麗國王至元十
七年曆日十一月戊申敕諸路所捕盜初犯賊多者死

再犯賊少者從輕罪論阿哈瑪特言有盜以舊鈔易官
庫新鈔百四十錠者議者謂罪不應死盜者之父執役
臣家不論如法寧不自畏詔處死壬子遣禮部尚書柴
椿偕安南國使杜中贊齎詔往諭安南國世子陳日烜
責其來朝癸丑太陰犯熒惑乙卯罷太原平陽西京延
安路新簽軍還籍罷招討使劉萬努所管無籍軍願從
大軍征討者趙炳言陝西運司郭同知王相府郎中令
郭叔雲盜用官錢敕尚書托斯和侍御史郭祐檢覈之

戊辰命湖北道宣慰使劉深教練鄂州漢陽新附水軍
詔諭四川宣慰司括軍民戶數己巳以梧州妖民吳法
受扇惑藤州德慶府瀧水徭蠻為亂獲其父誅之併教
坊司入供衛司十二月戊寅發粟鈔賑鹽司竈戶之貧
者括甘州戶庚辰安南國貢藥材甲申祀太陽丙申敕
樞密翰林院官就中書省與索多議招收海外諸番事
丁酉巴喇呼貢海青回回等所過供食羊非自殺者不
食百姓苦之帝曰彼吾奴也飲食敢不隨我朝乎詔禁

之詔諭海內海外諸番國主賜右丞張惠銀五千四百兩敕自明年正月朔日建醮于長春宮凡七日歲以為例命李居壽告祭新歲詔諭占城國主使親自來朝索多所遣闍婆國使臣治中趙玉還改單州兗州隸濟寧路復置萬泉縣隸河中府改垣曲縣隸絳州降歸州路為州陞沔陽安陸各為府改京兆為安西路改惠州建寧梧州柳州象州邕州慶遠賓州橫州容州潯州竝為路建聖壽萬安寺于京城帝師琳沁卒敕諸國教師禪

師百有八人即大都萬安寺設齋圓戒賜衣是歲斷死
罪百三十二人保定等二十餘路水旱風電害稼

元史卷十

元史本紀卷十考證

至元十五年三月乙未宋廣王昺遣倪堅以表來上

案宋史十五年四月戊辰宋主昺殂于碭洲庚午始立昺則三月不應有昺先遣使之事當係紀載月日有誤

八月己卯初立提刑按察司于輝和爾地 案初立原本訛復立考世祖本紀至元十五年以前輝和爾地未嘗設官永樂大典本作初立今據改

十二月己卯朔 案原本脫朔字自己卯至下文戊申
共計三十日則己卯為朔日無疑今增

十二月戊申開成路置屯田總管府廣安州隸之 案
開成原本訛開城廣安州原本訛廣安縣今據地理
志改

十六年正月壬戌改播州鼎山縣為播川縣 案原本
訛改播川鼎山縣為播州縣考地理志廣西路有播
州無播州縣之名今據永樂大典本改

正月甲戌宋廣王昺偕其官屬赴海死 案宋史作二月癸未與此異

二月庚寅千夫長塔喇海授管軍千戶佩金符 案原

本作總管軍千戶又脫金字今據永樂大典本增改

二月甲辰命嘉定以西新附州郡質子入侍 案新附

原本訛新鄭考地理志嘉定府路州郡無新鄭之名


今據明南監本改

三月丙寅敕中書省掾史文移稽緩三日者死 案丙

寅原本訛丙辰今據前後干支改

六月癸巳詔以高州筠連州新附戶于敘州立驛案

筠字原本訛筠敘州原本訛澈並據地理志改



總校官編修臣吳紹濂

欽定四庫全書薈要

史部
元史卷十三

詳校官主事銜臣徐以坤



欽定四庫全書蒼要卷六千三百九十史部

元史卷十一

明翰林學士亞中大夫知制誥兼修國史宋濂等修

紀第十一

世祖八

十七年春正月癸卯朔高麗國王王暎遣其僉議中贊
金方慶來賀兼奉歲貢丙午命萬戶綦公直戍巴實伯
里賜鈔一萬二千五百錠辛亥磁州永平縣水給鈔貸



之丙辰立遷轉官員法凡無過者授見闕物故及過犯者選人補之滿代者令還家以俟又定諸路差稅課程增益者即上報隱漏者罪之不須履畝增稅以搖百姓詔括江淮銅及銅錢銅器辛酉以海賊賀文達所掠良婦百三十餘人還其家廣西廉州海賊霍公明鄭仲龍等伏誅甲子敕泉州行省所轄州郡山寨未即歸附者率兵拔之已拔復叛者屠之以總管張瑄千戶羅璧收宋二王有功陞瑄沿海招討使虎符璧管軍總管金符

丁卯改近郊詔毋以侍衛軍供工匠役戊辰敕姜衛檢
覈阿爾哈雅呼圖克特穆爾等所俘丁三萬二千人並
放為民置行中書省于福州改德慶路為總管府賜開
灤河五衛軍鈔二月乙亥張易言高和尚有秘術能役
鬼為兵遙制敵人命和爾魯斯將兵與高和尚同赴北
邊丙子立北京道二驛丁丑塔爾巴噶以雲南行省軍
攻定昌路擒總管古納殺之詔令塔爾巴噶還以阿達
代之敕非遠方歸附人毋入會同館詔尼雅斯拉鼎將

萬人征緬國乙酉賞尼雅斯拉鼎所部征金齒功銀五千三百二十兩己丑命梅國賓襲其父應春瀘州安撫使職瀘州嘗叛應春為前重慶制置使張珣所殺國賓詣闕訴冤詔以珣界國賓使復其父讎珣時在京兆聞之自經死國賓請贖還瀘州軍民之為俘者從之日本國殺國使杜世忠等征東元帥實都洪察球爾請自率兵往討廷議姑少緩之丙申詔真人析志誠等焚毀道藏偽妄經文及板庚子阿爾哈雅及尼雅斯拉鼎招緬

國及洞蠻降臣詔就軍前定錄其功以聞江淮行省左丞
夏貴請老從之仍官其子孫哈喇所部和州等城為叛
兵所掠者賜鈔給之仍免其民差役三年發侍衛軍三
千浚通州運糧河輝和爾戶居河西界者令屯田辛丑
以廣中民不聊生召右丞達春左丞呂師夔廷詰壞民
之由命頁特密實賈居貞行宣慰司徒撫之師夔至廷
辯無驗復令還省治事詔王相府於諸鄂羅市馬二萬
六千三百匹遣使代祀岳瀆賜諸王安巴堪訥默音所

部及征日本行省阿嚙罕范文虎等西錦衣銀鈔幣帛
各有差又賜四川貧民及烏拉岱等馬牛羊價鈔三月
癸卯命福建王積翁入領省事中書省臣以為不可改
戶部尚書甲辰車駕幸上都思播州軍侵鎮遠黃平界
命李德輝等往視之罷通政院官不勝任者丙午敕東
西兩川發蒙古漢軍戍魚通黎雅乙卯立都功德使司
從二品掌奏帝師所統僧人并吐番軍民等事己未詔
討羅氏鬼國以蒙古軍六千哈喇章軍一萬西川雅爾

哈萬嘉努軍萬人阿爾哈雅軍萬人三道並進癸亥高郵等處饑賑粟九千四百石辛未立輝和爾境內交鈔

提舉司給諤特古斯八部屯田牛具賜孟古岱等羊馬及皇子諾木罕下羊馬價夏四月壬申朔中書省臣言

索多軍士擾民故南劔等路民復叛及孟古岱往招徠之民始獲安詔以孟古岱仍行省福州癸酉南康杜可用叛命史弼討擒之定杭州宣慰司官四員以游顯管如德呼圖克劉宣充之丙子隆興路楊門站復為懷安

縣庚辰四川宣慰使伊克德濟請賜海青符命以二符
給之壬午史弼入朝乙酉以宋太常樂付太常寺改泗
州靈壁縣仍隸宿州丁亥立杭州路金玉總管府甲午
敕軍戶貧乏者還民籍丙申以羅佐山道梗敕阿爾哈
雅發軍千人戍守以隆興泉州福建置三省不便命廷
臣集議以聞己亥諸王哲伯特穆爾請各投下設官不
從庚子歲星犯軒轅大星敕權停百官俸寧海益都等
四郡霜真定七郡蟲皆損桑五月辛丑朔樞密院調禁

兵六百守居庸南北口甲辰作行宮於察汗諾爾丙午
陞沙州為路癸丑括沙州戶丁定常賦其富戶餘田令
所成漢軍耕種詔雲南行省發四川軍萬人命雅爾哈
領之與前所遣將同征緬國高麗國王王賸以民饑乞
貸糧萬石從之福建行省移泉州甲寅汀漳叛賊廖得
勝等伏誅造船三千艘救耽羅發材木給之庚申賜諸
王伯竒特穆爾銀印辛酉賜國師掌教所印賞巴延將
士戰功銀二萬八千七百五十兩真定咸平忻州漣海

邳宿諸州郡蝗六月辛未朔以呼圖克岱爾收籍拉木伊克

人民牛畜撥荒地令屯田壬申復招諭占城國丁丑索

多部下顧總管聚黨海道劫貨范文虎招降之復議寘

于法命文虎等集議處之安塔哈等請罷江南稅課提

舉司阿哈瑪特力爭詔御史臺選官檢覈其實以聞阿

哈瑪特請立大宗正府罷上都鄂羅官以留守司兼管

鄂羅事西安王薨罷其王相府遣呂告蠻部安撫使王

阿濟同萬戶咎坤招諭羅氏鬼國壬辰召范文虎議征

日本戊戌高麗王王睦遣其將軍朴義來貢方物江淮等處頒行鈔法廢宋銅錢遣博羅哈達等覈江淮行省阿里布雅克特穆爾錢穀改泗州隸淮安路賜呼喇圖呼巴哩等將士力戰者銀鈔及給伊克徹爾等軍士羊馬價鈔各有差秋七月辛丑廣東宣慰使特穆爾布哈言諸軍官宜一例遷轉江淮郡縣首亂者誅沒其家官豪隱庇佃民不供徭役宜別立籍各萬戶軍交叅重役宜發還元翼詔中書省樞密院翰林院集議以聞敕思

州安撫司還舊治戊申太陰犯房距星以高麗國初置
驛站民乏食命給糧一歲仍禁使臣往來勿求索飲食
已酉立行省于京兆以前安西相李德輝為叅知政事
兼領錢穀事徙泉州行省于隆興以托和木軍劫和卓
輝和爾城禾民饑命官給驛馬之費仍免賦稅三年太
陰犯南斗甲寅發衛兵八百治沙嶺橋救毋踐民田戊
午徙阿哈瑪特言以叅知政事郝禎耿仁並為中書左
丞用姚演言開膠東河及收集逃民屯田漣海甲子遣

安南國王子倪還括蒙古軍成丁者敕伊爾等率萬人
入羅氏鬼國如其不附則入討之乙丑罷江南財賦總
管府丁卯併大都鹽運司入河間為一仍減汰冗員割
建康民二萬戶種稻歲輸釀米三萬石官為運至京師
戊辰詔括前願從軍者及張世傑潰軍使征日本命范
文虎等招集避罪附宋蒙古回回等軍已遣中使約
尼歷江南名山訪求高士且命持香幣詣信州龍虎山
臨江閣皂山建康三茅山皆設醮賜阿齊哈等及集賽

台等戰功銀鈔賜招收散毛等洞官吏衣段八月庚午
朔蕭簡等十人歷河南五路擅招拉木伊克戶事覺謫
其為首者從軍自効餘者杖之乙亥改蒙古侍衛總管
為蒙古侍衛親軍都指揮使司丙子太陰犯心東星丁
丑索多請招三佛齊等八國不從鎮守南劔路萬戶呂
宗海竊兵亡去詔追捕之戊寅占城馬八兒國皆遣使
奉表稱臣貢寶物犀象以前所括願從軍者為軍付察
呼領之征日本丁亥許衡致仕官其子師可為懷孟路

總管以便侍養納碧玉盞六白玉盞十五于太廟癸巳
賜西平王所部糧戍戍高麗王王暉來朝且言將益兵
三萬征日本以范文虎實都洪察球爾為中書右丞李
庭張巴圖為參知政事並行中書省事賜竒爾濟蘇等
鈔穆爾烏克等羊馬齊喇拉等牛羊馬價及東宮位下
齊哩克昆等粟帛大都北京懷孟保定南京許州平陽
旱濮州東平濟寧磁州水九月壬子車駕至自上都壬
戌伊克德濟征鄂端癸亥命沿途廩食和琳回軍甲子

太陰掩右執法犯歲星乙丑守庫軍盜庫鈔巴喇噶齊
分其贓縱盜遁去詔誅之丁卯羅氏鬼國主阿察及阿
里降西安王相李德輝遣人偕入覲賜巴喇噶齊等羊
馬價二萬八千三錠及托歡下貧民糧三月冬十月庚
午塔爾巴噶軍與賊力戰者命給田賞之癸酉加高麗
國王王晷開府儀同三司中書左丞相行中書省事甲
戌遣使括開元等路軍三千征日本丙子賜雲南王和
克齊印丁丑以湖南兵萬人伐亦奚不薛亦奚不薛降

戊寅發兵十萬命范文虎將之賜右丞洪察球爾所將
征日本新附軍鈔及甲辛巳立營田提舉司從五品置
司柳林割諸色戶千三百五十五隸之官給牛種農具
壬午詔立陝西四川等處行中書省以布哈為右丞李
德輝汪惟正並左丞時德輝已卒甲申詔龍虎山天師
張宗演赴闕已丑命達實窮黃河源辛卯以漢軍屯田
沙甘壬辰亦奚不薛病遣其從子入覲帝曰亦奚不薛不
稟命輒以職授其從子無人臣禮宜令亦奚不薛出乃

還軍癸巳詔諭和州諸城招集流移之民丙申命在官者任事一月後乃給俸或廢事者斥之遣使諭瓜哇國及交趾國始製象轎給齊喇等糧賜呼爾察家貧乏者十一月己亥朔翰林學士承旨和爾果斯等言俱藍馬八閣婆交趾等國俱遣使進表乞荅詔從之仍賜交趾使人職名及弓矢鞍勒降詔招諭瓜哇國乙巳置泉府司掌領御位下及皇太子皇太后諸王出納金銀事敕別置局院以處童匠有貧乏者給以鈔幣詔有罪配役

者量其程遠近犯罪當死者詳加審讞戊申中書省臣
議流通鈔法凡賞賜宜多給幣帛課程宜多收鈔制曰
可庚戌命和爾果斯揀汰交趾國使除可留者餘皆放
還辛亥敕緩營建工役壬子詔諭俱藍國使來歸附甲
寅太原路堅州進嘉禾六莖壬戌詔江淮行中書省招
巧匠甲子詔頒授時厯丁卯詔以瑪噶珊民貧除倉站
稅課外免其役三年復遣宣慰使嘉琿益慶元等持詔
諭占城國主令其子弟或大臣入朝詔江南江北陝西

河間山東諸鹽場增撥竈戶賜將作院呂哈喇工匠銀鈔幣帛十二月庚午以江淮行省平章政事阿里布左丞雅克特穆爾擅易命官八百員自分左右司官鑄銀銅印違命不散防守軍敕誅之辛未以熟券軍還襄陽屯田高麗國王王晷領兵萬人水手萬五千人戰船九百艘糧十萬石出征日本給右丞洪察球爾等戰具高麗國鎧甲戰襖諭諸道征日本兵取道高麗毋擾其民以高麗中贊金方慶為征日本都元帥密直司副使朴

球金周鼎為管高麗國征日本軍萬戶並賜虎符癸酉
以高麗國王王暎為中書右丞相甲戌復授征日本軍
官元佩虎符丁丑用呼遜言以民當站役十戶為率官
給一馬死則買馬補之戊寅以奉使木剌由國斯隆瑪
等為招討使佩金符己卯羅氏鬼國土寇為患思播道
路不通發兵千人與洞蠻開道甲申甘州增置站戶詔
於諸王戶籍內簽之乙酉敕民避役竄名匠戶者復為
民准西宣慰使昂吉爾請以軍士屯田安塔哈等以發

民兵非便宜募民願耕者耕之且免其租三年從之丁亥復詔管民官兼管諸軍鄂囉戊子以征也可不薛軍千五百復還塔海戍八番羅甸壬辰陳桂龍據漳州反索多率兵討之桂龍亡入畚洞甲午大都重建太廟成自舊廟奉遷神主于祔室遂行大享禮置鎮北庭都護府于輝和爾境以托克托穆爾等領之丙申遼東路所益兵以妻子易馬敕以合輸賦稅贖還之敕鏤板印造帝師巴克斯巴新譯戒本五百部頒降諸路僧人左丞

相阿珠巡歷西邊至巴實伯里以疾卒救擅據江南逃
亡民田者有罪修桐栢山淮瀆祠以三茅山上清四十
三代宗師許道杞祈禱有驗命別主道教安南國來貢
馴象賜蠻洞主銀鈔衣物有差賑鞏昌帝德等路饑民
仍免其徭役改拱衛司為都指揮司陞尚舍監秩三品
立太倉提舉司秩五品改建寧雷州封州廉州化州高
州為路以肇慶路隸廣南西道遷峽州路于江北舊治
復置鄆縣隸鞏昌路宿州靈璧縣復隸歸德是歲斷死

罪一百二人

十八年春正月戊戌朔高麗國王王暎遣其簽議中贊
金方慶來賀兼奉歲幣辛丑召阿嘍罕范文虎囊嘉特
同赴闕受訓諭以巴圖張珪李度留後命實都洪察球爾
軍陸行抵日本兵甲則舟運之所過州縣給糧食用范
文虎言益以漢軍萬人文虎又請馬二千給托色呼孫
軍及回回砲匠帝曰戰船安用此皆不從癸卯發鈔及
金銀付博囉以給貧民丁未畋于近郊敕江南州郡兼

用蒙古回回人凡諸王位下合設達魯噶齊並令赴闕
仍詔諭諸王阿濟格等知之己酉改黃州陽羅堡復隸
鄂州辛亥遣使代祀嶽瀆后壬子高麗國王王暎遣
使言日本犯其邊境乞兵追之詔以戊金州隘口軍五
百付之丙辰車駕幸鄴州改符寶局為典瑞監收天下
諸司職印丁巳制以六祖李全祐嗣五祖李居壽祭斗
癸亥邠武民高日新據龍樓寨為亂擒之賞賈都等戰
功賜征日本諸軍鈔二月戊辰發侍衛軍四千完正殿

賜征日本善射軍及高麗火長水軍鈔四千錠辛未車
駕幸柳林高麗王王暉以尚主乞改宣命益駙馬二字
制可乙亥敕以耽羅新造船付洪察球爾出征詔以刑
徒減死者付實都為軍揚州火發米七百八十三石賑
被災之家詔諭范文虎等以征日本之意仍申嚴軍律
立上都留守司陞敘州為路隸安西省移潭州省治鄂
州徙湖南宣慰司于潭州乙酉改輝和爾斷事官為北
庭都護府陞從二品丙戌征日本軍啓行朔東饑發粟

千二百七十餘石賑之己丑發肅州等處軍民鑿渠溉
田給征日本軍衣甲弓矢海青符敕通政院官瑄都與
郭漢傑整治水驛自敘州至荆南凡十九站增戶二千
一百船二百十二艘詔諭烏瑣納空等毋擾羅氏鬼國
違者令國主阿利具以名聞福建省左丞蒲壽庚言詔
造海船二百艘今成者五十民實艱苦詔止之乙未貞
懿順聖昭天睿文光應皇后鴻吉哩氏崩丙申車駕還
宮詔三茅山三十八代宗師蔣宗瑛赴闕遣丹巴巴克

實等詣東海及濟源廟修佛事以中書右丞行江東道

宣慰使阿嚙罕為中書左丞相行中書省事江西道宣

慰使兼招討使頁特密實參知政事行中書省事以遼

陽懿蓋北京大定諸州早免今年租稅之半三月戊戌

許衡卒己亥敕黃平隸西安行省鎮遠隸潭州行省各

遣兵戍守甲辰命天師張宗演即宮中奏赤章于天七

晝夜丙午車駕幸上都丙辰陞軍器監為三品辛酉立

登聞鼓院許有冤者搥鼓以聞夏四月辛未益雲南軍

征合剌章癸酉復頒中外官吏俸辛巳通泰二州饑發粟二萬一千六百石賑之戊子置蒙古漢人新附軍總管甲午命太原五戶絲就輸太原自太和嶺至巴實伯里置新驛三十賜征日本河西軍等鈔五月癸卯禁西北邊回回諸人越境為商甲辰遣使賑瓜沙州饑戊申罷霍州輝和爾按察司己酉禁甘肅瓜沙等州為酒壬子免耽羅國今歲貢白紵丙辰以烏蒙阿穆宣撫司隸雲南行省歲星犯右執法庚申嚴鬻人之禁乏食者量

加賑貸壬戌詔括契丹戶救耽羅國達嚕噶齊達喇齊
禁高麗全羅等處田獵擾民六月丙寅敕賽音諤德齊
和尼齊分管鄂摩巴圖奇爾等八處民戶謙州織工百
四十二戶貧甚以粟給之所鬻妻子官與贖還以太原
新附軍五千屯田甘州丁丑以按察司所劾羨餘糧四
萬八千石餉軍己卯以順慶路隸四川東道宣慰司安
西等處軍站凡和顧和買與民均後增陝西營田糧十
萬石以充常費壬午命耽羅戍力田以自給日本行省

臣遣使來言大軍駐巨濟島至對馬島獲島人言太宰府西六十里舊有戍軍已調出戰宜乘虛擣之詔曰軍事卿等當自權衡之癸未命中書省會計姚演所領連海屯田官給之資與歲入之數便則行之否則罷去丁亥放竒徹所招獵戶七千為民庚寅以阿嚙罕有疾詔安塔哈統率兵馬征日本壬辰高麗國王王晷言本國置驛四十民畜凋弊敕併為二十站仍給馬價八百錠奉使木剌由國沙木斯鼎至占城船壞使人來乞舟糧

及益兵詔給米一千四百餘石以中書左丞呼圖克特
穆爾為中書右丞行中書省事御史中丞行御史臺事
呼喇珠為中書左丞行尚書省事賜皇子諾木罕所部
工匠羊馬價鈔秋七月甲午朔命萬戶綦公直分宣慰
使劉恩所將屯肅州漢兵千人入巴實伯里以嘗過西
川兵百人為嚮導丁酉敕甘州置和中所以給兵糧京
兆四川分置行省於河西己亥阿嚙罕卒庚子括回回
砲手散居他郡者悉令赴南京屯田癸卯太陰犯房距

星庚戌以實都戌大和嶺所將蒙古軍還復令漢軍戌
守以松州知州布薩圖格前後射虎萬計賜號萬虎將
軍賜桂齊哈瑪爾圖所招和真淦等戶二千八百二十
俾自領之辛酉索多征占城賜馳蓬以辟瘴毒占城國
來貢象犀命天師張宗演等即壽寧宮奏赤章于天凡
五晝夜八月甲子朔招討使方文言擇守令崇祀典戢
姦吏禁盜賊治軍旅獎忠義六事詔廷臣及諸老議舉
行之丙寅熒惑犯諸侯西第三星庚午孟古岱為中書

右丞行中書省事辛未敕隆興行省參政劉哈瑪爾圖
凡金穀造作專領之乙亥甘州凡諸投下戶依民例應
站役申嚴大都總管府兵馬司左右巡院斂民之禁庚
寅以阿嚙罕既卒命安塔哈等分戍三海口令安塔哈
就招海中餘寇高麗國王王晷遣其密直司使韓康來
賀聖誕節壬辰以開元等路六驛饑命給幣帛萬二千
匹民鬻妻子者官為贖之詔征日本軍回所在官為給
糧實都洪察球爾范文虎李庭金方慶諸軍船為風濤

所激失利餘軍回至高麗境十存一二設醮于上都壽
寧宮賜鴻濟古爾部及茂齊哩克等羊馬價及重嘉努
等助軍羊馬鈔賜常河部軍貧乏者給過西川軍糧海
南諸國來貢方物給集賽台糧拘其所占田為屯田閏
月癸巳朔熒惑犯司怪南第二星安塔哈乞以戌三海
口軍擊福建賊陳弔眼詔以重勞不從敕守縉山道侍
衛軍還京師壬寅瓜州屯田進瑞麥一莖五穗丙午車
駕至自上都庚戌太陰犯昴丁巳命播州每歲親貢方

物改思州宣撫司為宣慰司兼管內安撫使陞高麗簽
議府為從三品敕中書省減執政及諸司冗員遣烏蘭
哈達運沙城等糧六千石入和琳括江南戶口稅課庚
申安南國貢方物江西行省薦舉兵官命罷之壬戌詔
鄂端等三城官民及呼圖克岱爾括布呼齊人口兩淮
轉運使阿喇卜丹坐盜官鈔二萬一千五百錠盜取和
買馬三百四十四疋朝廷宣命格而弗頒又以官員所
佩符擅與家奴往來貿易等事伏誅賜謙州屯田軍人

鈔幣衣裘等物及給農具漁具償站匠等助軍羊馬價
九月癸亥朔畋于近郊甲子增大都巡兵千人給鈔賑
上都饑民癸酉高價市舶物貨已經泉州抽分者諸處
貿易止令輸稅益耽羅戍兵仍命高麗國給戰具庚辰
還宮辛巳大都立蒙古站屯田編戶歲輸包銀者及真
定等路拉木伊克戶並令屯田其在真定者與免皮貨
癸未京兆等路歲額自一萬九千錠增至五萬四千錠
阿哈瑪特尚以為未實欲覈之帝曰阿哈瑪特何知事

遂止大都新安縣民復和顧和買甲申太陰犯軒轅大

星壬辰占城國來貢賜修大都城侍衛軍鈔幣有差賞

北征軍銀鈔賜齊哩克昆及四鄂爾多下與范文虎所

部將士羊馬衣服幣帛有差冬十月乙未享于太廟貞

懿順聖昭天睿文光應皇后祔丙申募民淮西屯田已

亥議封安南王號易所賜安南國輝和爾字虎符以國

字書之仍詔諭安南國立日烜之叔遺愛為安南國王

庚子溪洞新附官鎮安州岑從毅縱兵殺掠迫死知州

李顯祖召從毅入覲壬寅賜征日本將校衣裝幣帛靴帽等物有差乙巳命安西王府協濟戶及南山隘口軍於安西延安鳳翔六盤等處屯田河西置織毛段匠提舉司丁未安南國置宣慰司以北京路達魯噶齊巴延特穆爾參知政事行安南國宣慰使都元帥佩虎符柴椿鴻和爾副之給鈔萬錠付河西行省以備經費己酉張易等言參校道書惟道德經係老子親著餘皆後人偽撰宜悉焚毀從之仍詔諭天下給隆興行省海青符

命失里咱牙信合八刺麻合迭瓦為占城郡王加榮祿
大夫賜虎符立行中書省于占城索多為右丞劉深為
左丞兵部侍郎伊埒默色參知政事庚戌敕以海船百
艘新舊軍及水手合萬人期以明年正月征海外諸番
仍諭占城郡王給軍食以安南國王陳遺愛入安南發
新附軍千人衛送詔諭于不昔國來歸附壬子用和爾
果斯言於揚州隆興鄂州泉州四省置蒙古提舉學校
官各二員以翰林學士承旨色埒默兼領會同館集賢

院事以平章政事樞密副使張易兼領祕書監太史院
司天臺事以翰林學士承旨和爾果斯守司徒改大都
南陽真定等處屯田布疋齊總管府為農政院癸丑皇
太子至自北邊丙辰以烏蘭哈達言上都南四站人畜
困乏賜鈔給之庚申籍西川戶辛酉邠武叛人高日新
降給征日本回侍衛新附軍冬衣賜劉天錫等銀幣僧
額埒等羊馬鈔諸王阿濟格等馬牛羊各有差十一月
癸亥朔詔諭特穆爾令歸附甲子敕誅陳弔眼首惡者

餘並收其兵仗繫送京師已巳敕軍器監給兵仗附高麗沿海等郡奉使占城孟慶元孫勝夫並為廣州宣慰使兼領出政調度高麗國金州等處置鎮邊萬戶府以控制日本高日新及其弟鼎新等至闕以日新兩為叛首授山北路民職文慶之屬遣還泉州賜有功將校二百二十三員銀十萬兩及幣帛弓矢鞍勒有差詔安南國王給占城行省軍食高麗國王請完濱海城防日本不允辛未給諸王阿濟格糧六千石甲戌太陰犯五車

次南星乙亥召法師劉道真問祠太乙法丁丑太陰犯
鬼壬午詔諭爪哇國主使親來覲昌州及哈里泊民饑
給鈔賑之丙戌給鈔二萬錠付和林貿易救征日本回
軍後至者分戍沿海丁亥太陰掩心東星給揚州行省
新附軍將校鈔人二錠己丑賜安南國出征新附軍鈔
賜禮部尚書留夢炎及出使馬八國溫都爾等鈔各有
差十二月甲午以昂吉爾岱為中書右丞相己亥罷日
本行中書省丙午太陰犯軒轅大星丁未議選侍衛軍

萬人練習以備扈從陞太常寺為正三品辛亥命西川
行省給萬嘉努所部兵仗癸丑敕免益都淄萊寧海開
河夫今年租賦仍給其傭直乙卯以諸王濟古爾所占
文安縣地給付屯田丙辰調新附軍屯田獲福州叛賊
林天成戮于市免福州路今年稅二分十八年以前租
稅並免徵以漢州德陽縣隸城都府改漳州為路賜禮
部尚書謝昌元鈔賞訥古伯戰功銀有差償阿濟格等
助軍馬價賜塔喇海籍沒戶五十是歲保定路清苑縣

水平陽路松山縣旱高唐夏津武城等縣蝨害稼並免
今年租計三萬六千八百四十石斷死罪二十二入

元史卷十一

元史本紀卷十一考證

至元十八年二月乙未皇后鴻吉哩氏崩 案本傳作
至元十四年二月與此異

閏八月壬寅瓜州進瑞麥 案原本訛壬辰今據前後
干支改

十一月己丑賜出征新附軍 案己丑原本訛己酉
是月癸亥朔至己丑則四十七日以上文丁亥下月
甲午推之當係己丑之誤今改

